



UPM Ambil 4,814 Pelajar Baharu



Datuk Dr. Nik Mustapha R. Abdullah beramah mesra dengan pelajar baharu UPM bagi kemasukan sesi 2009/2010 pada pendaftaran di Kolej Ke-12

SERDANG, 28 Jun – Universiti Putra Malaysia (UPM) mengambil seramai 4,814 pelajar baharu bagi pendaftaran kemasukan semester pertama sesi 2009/2010 pada 27 dan 28 Jun baru-baru ini.

Naib Canselor UPM, Prof. Datuk Dr. Nik Mustapha R. Abdullah berkata jumlah tersebut membabitkan pelajar bachelo seramai 3,964 orang, Asasi Sains Pertanian 300, sementara 550 pelajar diploma pula mendaftar di UPM kampus Bintulu, Sarawak.

Beliau berkata pada semester kali ini terdapat satu program baharu yang ditawarkan iaitu Bachelo Sains dan Teknologi Alam Sekitar di Fakulti Pengajian Alam Sekitar.

"Kursus-kursus Agro-bio, Sains Tulen, Sains Gunaan, Perubatan dan Kesihatan Bersekutu, Kejuruteraan & Teknikal dan Sains Sosial menjadi pilihan pelajar kesan promosi program pengajian di seluruh negara dan kekuatan kurikulum program tersebut," katanya pada sidang media bersama Timbalan Menteri Pengajian Tinggi Dato' Saifuddin Abdullah di Kolej 10, UPM.



Timbalan Menteri Pengajian Tinggi, Datuk Saifuddin Abdullah ditemubual oleh wartawan media dan elektronik pada sidang media 'Siri Turun Kampus – Mesra Mahasiswa Baru' di UPM

Turut hadir pada sidang media tersebut ialah Timbalan Naib Canselor (Akademik dan Antarabangsa) UPM, Prof. Datin Paduka Dr. Aini Ideris, Ketua Pentadbiran Pengajian Pra Siswazah UPM, Chek Zan Kasah dan Ketua Pusat Kesihatan Universiti, Dr. Yahaya Abu Ahmad.

Katanya jumlah pengambilan pelajar baharu seramai 4,814 itu berkurangan seramai 420 pelajar berbanding 5,234 pada tahun sebelumnya kerana unjuran pengambilan pelajar baharu pra-siswazah dibuat selaras dengan dasar UPM sebagai Universiti Penyelidikan yang akan meningkatkan jumlah pelajar pasca siswazah.

Datuk Dr. Nik Mustapha berkata peratusan gender pelajar baharu ialah 70 peratus pelajar perempuan sementara 30 peratus pelajar lelaki.

Dato' Saifuddin berkata pendaftaran kali ini merupakan kumpulan pertama kemasukan pelajar baharu sejak pindaan Akta Universiti digazetkan pada Februari 2009 yang menuntun era baru di mana mahasiswa dan universiti mendapat kebebasan yang lebih.

"Kumpulan pertama ini boleh menggunakan kesempatan yang ada untuk mengoptimalkan peluang menjadi seorang mahasiswa dalam erti kata yang sebenar," katanya pada sidang media tersebut.

Beliau berkata setelah meninggalkan alam persekolahan, kedewasaan bukan bermakna mahasiswa boleh membuat perkara sesuka hati tetapi kedewasaan menuntut kematangan dan kebijaksanaan mahasiswa, selain universiti perlu menganggap mereka dewasa.

Terdahulu, Datuk Saifuddin meluangkan masa meninjau proses pendaftaran pelajar baharu melalui program 'Siri Turun Kampus – Mesra Mahasiswa Baru' di Universiti Kebangsaan Malaysia, Universiti Tenaga Nasional dan UPM.

Pada majlis yang sama, Datuk Saifuddin memperkenalkan atlit bola keranjang negara, Nor Izzati Yaakob yang mendaftar sebagai pelajar baharu UPM program Bachelo Komunikasi.

"Izzati merupakan atlit negara dalam bola keranjang tetapi memilih Bachelo Komunikasi yang luar daripada bidang yang diceburinya sekarang dan ramai atlit negara memasuki UPM untuk menyambung pelajaran mereka," katanya.

Pencapaian terbaik Izzati ialah pasukan yang disertainya pernah mendapat tempat keempat pada William Jones Cup di Taiwan pada tahun lalu.

Datuk Saifuddin turut mengambil kesempatan meninjau proses pendaftaran pelajar baharu dan beramah mesra dengan pelajar di Kolej 10 UPM selepas sidang media.

Sementara itu Ketua Pusat Kesihatan Universiti, Dr. Yahaya Abu Ahmad berkata semua pelajar baharu UPM perlu menjalani saringan Influenza A (H1N1) di Pusat Kebudayaan dan Kesenian Sultan Salahuddin Abdul Aziz Shah (PKKSAS) sebelum mendaftar di kolej kediaman masing-masing.

"Semua pelajar baharu dikehendaki mematuhi arahan pemeriksaan kesihatan tersebut sebelum melaksanakan pendaftaran kolej kediaman bagi memastikan penularan wabak tersebut terkawal," katanya.

Kementerian Kesihatan Malaysia sebelum itu telah memohon supaya semua pihak di Institusi Pengajian Tinggi Awam melalui Pusat Kesihatan Universiti mengambil tindakan untuk melakukan saringan virus tersebut kepada pelajar baharu yang akan mendaftar.

Sementara itu, Kolej 11 menerima pendaftaran pelajar orang kurang upaya iaitu Nur Baitul Izzah Nordin, pelajar program Bachelo Biologi yang menggunakan kerusi roda kerana penyakit semulajadi lemah anggota kaki.

"Saya berharap dapat menyahut cabaran belajar di UPM dan berharap staf UPM dapat memberi kerjasama kepada saya untuk menjadi graduan UPM yang cemerlang. Sekiranya orang lain boleh berjaya kenapa tidak saya," katanya ketika ditemui semasa pendaftaran.

Sementara itu bapa kepada pelajar bahru Auguspine Ignacy yang memuji pendaftaran pelajar berjalan lancar berkata anaknya William, kursus Bachelo Pembangunan Manusia dan Pengurusan sebenarnya mengikuti jejak abangnya, Richard, graduan Bachelo Pendidikan Bahasa Melayu UPM.



Pembantu Perubatan UPM sedang membuat saringan wabak influenza A(H1N1) terhadap pelajar baharu yang mendaftar untuk memasuki ke UPM bagi sesi 2009/2010 baru-baru ini